

# LA CARTA DEL APOSTOL SAN PABLO A LOS COLOSENSES

---

**Pablo embesa mbesa Colosas jenda je**

**1** <sup>1</sup> Pablo chō se re. Dios chiirabo chō se re. Jesucristo que seirabo mingo ucheē nenei nenei sacuā nda. Timoteo rese aico ā mbesa mbesa jēje a. Nanderesenda Timoteo. <sup>2</sup>Dios rimba Colosas jenda je chō aico nguiā co mbesa mbesa a. Cristo icuasa hue jenda ja je. Ae Cristo icua tuchi quia nae, ũquĩ ja je. Sā Dios turā ndiqui bei jendese. Sā eriqui jembia bei. Sā Jesucristo abe riqui bei jendese.

**Pablo ñee Dios je Jesús quiato riĩ**

<sup>3</sup>Nandererecua tuchi rei Jesucristo. Dios rei eru. Ureico beite ñee Dios je jeniĩ ā. Gracias ure beite equia jeniĩ ā. <sup>4</sup>Ureirandu turāte quiatu ngue jendese re. Jesucristo jēicuate quiatu nguiā ure je ũquĩ. Jenyesequa tuchi quiatu nguiā Dios quiato rese ũquĩ. <sup>5</sup>—Cristo rese ra nandeico je ibate, jenyete quiarei equia eicua ũquĩ. ũquĩ ndese que jēirandu tuchite nyii ra. Jesucristo cheē nenei nenei namo mose jēje nyii. <sup>6</sup>Jesucristo quiato echeē senei senei mbeite quia mangue chooñoa jenda ja je ā. Nyebe Jesús quiato riqui nguiā ñimbeta i i tuchi ā. Sā nandeico mbae a ucua ucua no, eĩ si chō ñene. Sā eriqui Jesucristo cheē nenei nenei jēje nyii no. Sā Jesucristo cheē jeñia mbitirō eandu ramo mose no. <sup>7</sup>Epafras abe que jembaaquiato quiato Cristo riĩ nda. Cristo resenda tuchi chō ae re. Ae chō Cristo cheē senei senei turā nguiā co. Nanderesenda tuchi chō ae re. <sup>8</sup>Ae que sembiirandu turāte jendese ra. Espíritu Turā ndiqui tuchi jendese ũquĩ. Nyebe jēingo nguiā nyesequa turāte mbia rese ũquĩ.

<sup>9</sup>Ureirandu mose jendese ũquĩ ndese, aque mose bei chō ureico nguiā ñee Dios je jeniĩ ā. Dios jemingo bei sacuā ubi rese. Ucheē abe rese. Dios uaquiato mee sacuā jēje. <sup>10</sup>Jēingo turā sacuā Dios mbia. Jēingo turā

sacuã mbae turã ja rese. Jê Dios icua i i tuchi sacua. <sup>11</sup>Dios jembirãcuã tuchi sacua uaquiato je. Jeñimbirãcuã tuchi sacua mbae rasi je. Ì nda jëingo tochi tuchi mbae ja je. Ũquĩ mose ra jëyate no. <sup>12</sup>Ureico gracias i tuchi Dios je ã. Ae quiatu ngue nandembuchiicabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. <sup>13</sup>Mbae icuã nguiatu que nanderereco quia itondáruu nyii ra. Dios que nandembui ũquĩ si cote ra. Nguiĩrĩ ndese que nandemingo cote ra. <sup>14</sup>Dios riĩrĩ ngue nandeisirõ umbaerã mbei ra. Mano ngue nanderiquicharõ nda. Nandeicuã ngue embutiã mbei nyesi ra.

### **Cristo que mano nandemingo turã sacua Dios rese ra**

<sup>15</sup>Mbia mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. <sup>16</sup>Dios ae que mbae chao eã nda. Nguiĩrĩ ndese quiatu ngue mbae ja ao nguiã. Mbae ibatenda ao ja. Mbae ibi riĩnda abe ao ja no. Ae rese nandeico mae ã nae, ũquĩ ja que Dios chao nguiĩrĩ ndese ra. Ae rese nandeico mae aroneate nae, ũquĩ abe que echao nguiĩrĩ ndese no nda. Mbia rerecua ja abe no. Aba checuayã ja abe no. Ũquĩ ja que Cristo chao ngu rese ra. Cristo mbaerã ño ũquĩ ja re. <sup>17</sup>Mbae ao ja nonde Cristo riqui rei nyii. Erĩ ño mbae riqui ja nguiã ã cote. <sup>18</sup>Dios quiato rerecua j a chõ Cristo riqui nguiã co. Sã nandeãquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua j a tuchi. <sup>19</sup>—Se rã sí tuchi Cristo jê, i que Dios ra. <sup>20</sup>Cristo mano mose, nandemingo turã sacua Dios rese chõ ñene. Nande miĩ mingo turã sacua eã ño ñene. Mbae ja mingo turã sacua Dios rese chõ Cristo mano nguiã. Mbae ja ibi riĩnda. Mbae ibei riĩnda ja abe no.

<sup>21</sup>Ishote que jëingo Dios si nyii ra. Mbae icuã naa naa mose. Ũquĩ mose que jëingo Dios ucuayãte ra. Jendua ndua icuãte que equia erĩ nda. Namu nguia eriqui nguiã jemingo turãte uchiese ũquĩ. <sup>22</sup>Cristo quiatu ngue mano nguiã jeniĩ. Mbia rete raanguia rerequia mose. Mbae rasi que esaã tuchi umano mose ra. Jeniĩ ño ngue mbae rasi raã nguiã. Jëicuã mbutiã sacua. Jemingo turã sacua icúe Dios mbaerã. <sup>23</sup>Nyebe jeñimbirãtã jiri quia Jesús icha rui. Jeñimondocho eã mbei quiatu quia jê. Jêhui eã ño Jesús cheẽ turã si jê. Jesús cheẽ turã ngue jeñandu tuchi quia. Mangue chooñoa jenda ja que ehandu ra. Se abe asenei senei tuchi quia Dios cheẽ nguire co. Pablo chõ se re.

### **Dios que seirabo ra, i Pablo**

<sup>24</sup>Se mbae rasi raã mose jêje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui

nguiã. Nyebe seyate riqui nguiã serete mbae rasi raã mose Cristo quiato je. <sup>25</sup>Dios que seirabo uquiato mbaaquiato quiatu ja sacuaã nda. Iglesia jenda ja. Dios cheẽ mbuchecua ja tuchi sacuaã jẽje. <sup>26-27</sup>Dios que seirabo judíos eã mbaaquiato quiatu sacuaã nda. Ae Dios mbuchecua eã mbei judíos je nyii nae, aico ùquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mii ño aba mingo arõ nguiã Dios rese co. Ùquĩ ño Dios mbuchecua ramo nguiã uquiato je co. <sup>28</sup>Cristo mii nii ño aico nguiã ñee mbia je co. Mbia ambuti mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo rii co. Ì nda Jesús quiato ja riqui siqui i i tuchi erese. <sup>29</sup>Nyebe serecoteã tuchite riqui nguiã ùquĩ ndese co. Dios quia sembirãcuã mbeite nguiã co. Mbia mbuti mbuti sacuaã Cristo icha rui.

**2** <sup>1</sup>Co secheẽ jeñandu rã. Andua ndua tuchite se quia nimbecoteã jendese co. Acheẽ tuchite se quia Dios je jeni co. Laodicea jenda nii abe no. Ae mae ãte quia serese Jesús quiato nae, ùquĩ nii abe no. Mbia mbaaquiato icuaã icuaã riqui jembui serite Cristo si ùquĩ. <sup>2</sup>Jẽ ja rii aico ñee Dios je co. Jẽingo i i sacuaã Dios rese jeñiangui re. Jenyesequa ja sacuaã jenyiese. Jendua ja sacuaã hue rĩ si. Jẽaquiato tuchi sacuaã Cristo rii. Ì nda Cristo jẽicua tuchi cote. <sup>3</sup>Cristo mii tuchi chõ aba mbaaracua nguiã co. Ae mii tuchi chõ aba mbaaquiato nguiã Dios rese co. <sup>4</sup>Mbia jembiiĩ iri eã sacuaã ño aico nguiã ñee jẽje co. Mbia cheẽ turã abareãte raque. Jesús cheẽ ndui eãte quia ñene. <sup>5</sup>Aico ndua ndua tuchi jendese co. Siqui rocoĩ jendese. Ae rese airandu jendese nae, sembia tuchi chõ ùquĩ nde. Jẽingo turã mose jenyiese. Jẽ Cristo icua i i tuchi mose. Nyebe seya bei tuchi riqui nguiã jendese co. <sup>6</sup>Sã Jesucristo jẽisi nyii no, eĩ jenye si chõ nguia siqui bei erese. <sup>7</sup>Sã ira riqui ngao mondo tuchi ibiqui rĩ no. Ñimbirãcuã tuchi sacuaã. Eĩ jenye si chõ nguia jẽ abe jẽ. Jeñimbirãcuã ño nguia Cristo rui. Cristo jẽicua tuchi quiatu quia. Secheẽ ñiinda rui sí. Gracias jenye bei chõ nguia Dios je.

### Dios que jembiasu Cristo rii cote ra

<sup>8</sup>Mbia ra jembiiĩ irichĩ jembiiicha nonde Cristo si jẽ. Ùquĩ ñee turã arõte raque. Ñee iru iru chõ nguiã ùquĩ. Ñimbuchã eãte equia Cristo rese ùquĩ. Mbia cheẽ achõ ño echeẽ nde. <sup>9</sup>Dios rã si tuchi rei Cristo. Mbia rete raãte raaque Cristo rete. <sup>10</sup>Ùquĩ jẽingo ñimbuchã Cristo rese ùquĩ. Cristo rã sí tuchi rei nande cote. Cristo quiarei ererecua tuchi mbia rerecua ja si. <sup>11</sup>Cristo que jembui jenyioseĩ oseĩ icua si cote ra. Jemingo que icúe Dios mbaerã cote ra. <sup>12</sup>Ùquĩ jẽingo Dios quirãcuã icuate ùquĩ. Sã mbia Jesús raaque ati rei no. Eĩ si chõ jẽ Jesús icua mose re. Jendaaque ati rã si chõ jẽ Jesús icua mose re. Sã Dios Jesús mbuquera si uquirãcuã je no. Eĩ si chõ jẽ Jesús icua mose re. Jembuquera si rã ño jẽ Jesús icua mose re. Dios chõ Jesús icua uquia nguiã jẽje. <sup>13</sup>Isho que jẽingo rei Dios si cose ra.

Jenyioseĩ osei icuã ndese siqui bei mose. Jẽ jẽicuã nderequia bei mose. Dios que ngueco mee jẽje cote ra. Jẽ Cristo icua mose. Dios que jẽicuã mbutiã cote ra. <sup>14</sup>Ae icuã nandesã saã nguia Dios je nae, Dios que ũquĩ mbutiã nadesi ra. Ae cheẽ nandemumba mumba quia mbia nae, ũquĩ ñee ngue Dios mbutiã nadesi cote ra. Dios nandeicuã mbucha raanguia Cristo rese chõ ñene. Cristo chĩ mose cruz rese. <sup>15</sup>Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

### Mbia chisaã saã ndese ra jẽingochĩ jẽ

<sup>16</sup>Sã emo jendiquisã quisã eã mbei mbaeiae mo si. Jẽ mbaeiae u sereã mose, jẽu eã ño. Jẽ euse mose, jẽu chõ. Jẽ jẽingose mose mbae mo ndese sãbado mose, jẽingo chõ erese. Jẽ jẽingose mose mbae mo ndese nyasi yasu mose, jẽingo chõ erese. Jẽingo sereã mose erese, jẽingoã erese.

<sup>17</sup>Cristo siqui nonde íbii chõ ngue ũquĩ ja nyii re. Mbia Cristo ru raarõ sacua ño ngue ũquĩ nyii re. Cristo tu mose que ũquĩ quiachã ja cote ra.

<sup>18</sup>Mbia jembĩrĩ írĩchĩ jembĩcha nonde Cristo si jẽ. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã equiatu rocoĩ. Ndua turã eã ño nguiã Dios rese ũquĩ. Unduasa rese achõ ño eriqui nguiã ucuasu raã naa ũquĩ. Ũquĩ nda jembĩchachĩ Cristo si jẽ. <sup>19</sup>Ñimbucha eã ño nguiã Cristo rese ũquĩ. Ererecua raque Cristo. Sã nandeãquĩ ndiqui nanderete mingo turã ja no. Eĩ si chõ Cristo uquiato mingo turã ja nguiã nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i i nguiã ee.

<sup>20</sup>Cristo mano mose que jẽ abe jemano erese resẽ. Mbia chisaã saã ima si que jẽhui turã ndesẽ. ¿Mbaerã nda ũquĩ ñee ndui si jẽingo si cote re?

<sup>21</sup>Sã ũquĩ ndiqui ñee no: “Jẽocochĩ nda ã ndese. Á nda jẽuchĩ no. Ũquĩ nda jẽisichĩ jẽo je no”, sã eriqui i no. ¿Mbaerã jẽingo ũquĩ ñee mumbayãte re? <sup>22</sup>Mbia cheẽ achõ ño ũquĩ ndesẽ. Dios cheẽ eã ño ũquĩ ndesẽ.

Nandechiurã ño mbae ja resẽ. <sup>23</sup>Ũquĩ ñee turã arõte raque. Eturã arõte raque mbia mbaeiae uã mose. Mbia mbaeiae uã mose, equiatu arõte raque. Siqui mingue arõte raque. Ũquĩ nda aba chioseĩ osei icuã mbutiã eã. Ũquĩ nda aba mingo eã Dios miĩ ndese.

### Jendua chã mbae ibatenda rese

**3** <sup>1</sup>Dios que jendaaque mbuquera si Cristo rese resẽ. Nyebe jẽingo mbae ibatenda osei. Mbae ibi jenda osei rocoĩ. Cristo quia chĩ nguiã ngoi ibate ngu jii hue. <sup>2</sup>Jendua quiatu quia mbae ibatenda rese. Mbae ibi jenda rese ndua rocoĩ. <sup>3</sup>Jemano ngue Cristo rese resẽ. Dios que jembucha Cristo rese resẽ. Nyebe Dios riqui nguiã jendeco rerecoquiato jẽje co. <sup>4</sup>Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

### Cose ndare rā eā ño jěingo nguiā ā cote

<sup>5</sup>Ae icuā jendeco quia jeñiangui re nae, ũquĩ icuā jěquiti chō jenyiesi. Jenyioseĩ oseĩ icuā jěquiti chō jenyiesi. Jěingochĩ nda jeninisiā mo ndese. Jendu eā ndese ra jěingochĩ no. “Aque rese nda aico rā ña”, jenyechĩ nda emo nii jě. Mbae icuā mo ndese ra jendua ndua jirichĩ jě. Emo mbae ra jenyoseĩ choseichĩ jě. Dios abareā ndese siqui raanguia chō ũquĩ nde. <sup>6</sup>Ā icuā ja riĩ nda Dios mbia mbasi. Ae echeē mumba mumbate quia. <sup>7</sup>Jě abe que ā icuā jěsaā saā tuchi quia nyii ra. Cristo icuayā mose. <sup>8</sup>Ā icuā jějea ja chō jenyiesi cote. Jě paama i. Jěicuā icuā nyue. Jeñee nyecua nyecua emo nii. Jenyuru icuā. Ā jějea ja chō jenyiesi. <sup>9</sup>Jeñee ñoñoohĩ nda jendesenda je jě. Jě mbae oseĩ oseĩ icuā ñiinda que jembuquiachā jenyiesi resē. Jenyisaā saā ima jěsaā eāte quia ũquĩ cote resē. <sup>10</sup>Jeñimbiasu ji chō jěingo nguiā ũquĩ. Nyebe Cristo riqui nguiā jembaaquiatu tuchi Dios riĩ ũquĩ. Jěingo turā sacuā Dios rā si. <sup>11</sup>Cristo quia rei mbia mbuchiabi abiā tuchi. Judíos raque. Judíos eā ndaque. Ishonda mo ndaque. Ae eaquiatuāte raque. Mbia rimba raque. Mbia rimba eā ndaque. Ũquĩ ja Cristo mbuchiabi abiā tuchi. Ũquĩ ja chianguĩ re Cristo riquise rete. Cristo siqui mose nandechiangui re, ũquĩ nguia rei eturā tuchi mbae ja si.

<sup>12</sup>Co Dios riqui nyesecua tuchi jendese co. Dios que jěirabo mingo icúe umbaerā nda. Nyebe jěingo nguiā siqui turāte. Jěya eā ño jěingo mbia rese. Jěseteā ño jěingo mbia rese. Jěingo tochi chō nguia. Jendoseĩ nguiatu chō jěingo. <sup>13</sup>Jeñimbirācuā ño nguia jendesenda rese. Jětesarei chō nguia jendesenda icuā icuā mose jěje. Sā Cristo tesarei jěicuā si no. <sup>14</sup>Jenyesequa tuchi quiatu quia mbia rese jě. Dios cheē tuchi chō ā nde. Jenyesequa tuchi mose mbia rese, mbae turā ja rese chō nda jěingo tuchi cote. <sup>15</sup>Jeñimbia bei chō nguia Dios rese. ĩ nda jemingo turā mbei jenyue. Ũquĩ nii ño Dios jemingo nguiā icúe umbaerā. Jesús rete mii na ño Dios jemingo nguiā ũquĩ. “Coche ñene” jenye bei chō nguia Dios je. <sup>16</sup>Sā Cristo cheē ndiqui tuchi jeñiangui re. Jěaquiatu tuchi nda jěingo chā. Jenongue jembaaquiatu quiatu chō nguia. Jenongue jembuti mbuti quiatu quia Cristo cuti. Jěirasei rasei tuchi quiatu quia Dios je. Himnos. Salmos. Jěya chō jěingo irasei rasei Dios je. <sup>17</sup>Jě mbae raā mose, Jesús riĩ ño jěsaā. Ae jěingo ñee nae, Jesús riĩ ño jeñee. Gracias jenyue bei chō nguia Dios je Jesús riĩ.

### Ae jěsaā nguia nae, jěsaā ño Cristo je

<sup>18</sup>Tacheē mbia ninisi je. Jendu cheē jemumbayā ño nguia. Diosbi tuchi chō ũquĩ nde. <sup>19</sup>Eru, jenyesequa tuchi quiatu quia jeninisi rese. Jěingo tochi chō nguia ee. <sup>20</sup>Mbia riirĩ, jendu cheē jemumbayā mbei chō nguia. Jěsi cheē abe no. Diosbi tuchi chō ũquĩ nde. <sup>21</sup>Jendiirĩ nda jembupaama ichĩ jenyue jě. ĩ nda ñimondocho eā. <sup>22</sup>Tacheē erimba je cote. Jenderecua

cheẽ jemumbayã mbei quiatu quia. Emae eã mose abe quiatu echeẽ jemumba eã. Jẽseteã jẽsaã ñoñoa nguia quia ee. Dios je quiatu jẽingo mbae raã turã ja. Ae quia mae mbeite nguia jendese co. <sup>23</sup>Jẽ mbae raã mose, jẽsaã turã ño nguia. Mbia je eã ño jẽingo nguia mbae raã. Dios je chõ jẽingo nguia eraã. <sup>24</sup>Dios ra mbae turã mee jẽje jenyisaã turã ndibishorõ. Cristo je chõ jẽingo nguia mbae ao ao ùquĩ. Jenderecua tuchi chõ ae re. <sup>25</sup>Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñoñoa no.

**4** <sup>1</sup>Mbia rerecua je tacheẽ cote. Jenimba jembuquiei quiei chooño eã ño nguia. Mbae jẽsaã turã jiri quiatu quia jenimba je. Jẽ abe jenderecua riqui Dios co no.

<sup>2</sup>Jeñee ñee mbei quiatu quia Dios je. Jẽtesa tesa bei quiatu quia Dios rese. Gracias jenyee bei quiatu quia ee. <sup>3</sup>Jeñee ñee mbei quiatu quia Dios je ure riĩ. Ñ nda Dios riqui sembuheẽ ñee mbei tuchi mbia je Cristo riĩ. Ae rese mbia riqui jiranuate Cristo rese nae, ùquĩ asenei senei sete mbia je. Nyebe setarõ ji aĩ nguia a. <sup>4</sup>—Paba, sã Pablo Jesucristo mbuchecua checua tuchi quia mbia je, jenyee bei quiatu quia Dios je.

<sup>5</sup>Jeñimbaaracua chõ nguia siqui turã Jesús quiatoã je. Ae Dios bite nae, ùquĩ ndese chõ jẽingo ñimbecoteã. <sup>6</sup>Sã embiquesa riqui mbae mbiise no. Eĩ jenyee si chõ nguia ñee turã mbia je. Ñ nda jëaquiature ñee Jesús quiatoã ñee ndibishorõ.

### Pablo ñee hui bei

<sup>7</sup>Tíquico si quia jendea aque. Ae ra mbae senei ja jẽje jembiiirandu seriĩ. Ae que mbae saã turã mbeite quia serese ra. Dios rimba turã tuchi chõ ae re. <sup>8</sup>Nyebe amondo nguia jendea aque. Jembiiirandu ja sacua serese. Jembia tuchi sacua Cristo rese abe. <sup>9</sup>Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. Ùquĩ nyeremo nda jembiiirandu tuchi a jenda ja rese.

<sup>10</sup>Aristarco tarõ ji ñi serese a. Ae abe saludos mondo quia jẽje aque. Marcos abe saludos mondo quia jẽje aque. Bernabé nongue riiĩ ño ae re. Ae oso mose jendea, jëisi turã ño secheẽ nguire. Acheẽ ngue jẽje eriĩ nyii. <sup>11</sup>Jesús Justo abe saludos mondo quia jẽje aque no. Ùquĩ miĩ judíos que siqui tuchi quia serese Dios cheẽ nenei nenei nda. Ùquĩ ngue sembiate quia mbae raã turã mose serese ra. <sup>12</sup>Epafras abe saludos mondo quia jẽje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jeniĩ co. Jẽingo irãtã sacua Dios rui. Ae Dios bite riqui nae, ùquĩ ndese jẽingo tuchi sacua. <sup>13</sup>Epafras riqui nyesecua tuchite jendese co. Aicuate se quia co. Laodicea jenda rese abe eriqui nyesecua tuchite co. Hierápolis jenda rese abe no. <sup>14</sup>Lucas abe saludos mondo quia jẽje aque no. Aba rasi rea reasa rei ae. Médico rei ae. Jesús chesecua

tuchi chõ ae re. Demas abe saludos mondo quia jêje aque no. <sup>15</sup>Jesús quiato Laodicea jenda je saldar jenye rã ure je. Ninfas je abe saldar jenye. Ae ñumunua nua nguia Ninfas chuchua Jesús quiato nae, ãquã abe je saldar jenye rã ure je. <sup>16</sup>Ae ambesa mbesa quia a nae, emondo nonde jêje a nae, ã je leer jenye ja rã. Aquere jemondo rã Jesús quiato Laodicea jenda je. Ñquã abe leer i sacuã ee. Ae carta ambesa Laodicea jenda je nae, jê abe leer jenye ee no. <sup>17</sup>Jeñee na Arquipo je. —Ae je Jesús ñee nae, “co esaã seje” i ndeje nae, ãquã esaã turã ja chõ, jenye Arquipo je.

<sup>18</sup>Hui bei sacuã co ambesa mbesa quia seo ae je co. Pablo chõ se re. Jendua serese setarõ ji rese. Sã Dios riqui turã tuchi jêje. Amén.